

Festival di Buki pa Mucha ta refleha nos comunidad multi nacional y multilingual



ORANJESTAD – Diabierna cu a pasa, Biblioteca Nacional Aruba (BNA) a bin cu su show di apertura di e Festival di Buki pa Mucha na Cas di Cultura. Esaki a tuma luga den presencia di minister di Enseñansa, Armando Lampe y demas invitadonan.

Tambe den cuadro di e apertura a wordo presenta e autornan cu a bin for di Hulanda, Surnam, Corsou, Bonaire y Aruba. Pero e biaha aki e festival a conta cu presencia di un autor Colombiano, Pedro Vargaz, kende a bin cu su obranan na Spaño.

E festival aki ta un refleho di e comunidad multi nacional y multilingual cu ta identifica nos isla. Como director di Biblioteca Nacional Aruba, Astrid Britten a bisa na Bon Dia Aruba cu e participacion aki di autornan cu nan buki na Papiamentu, Hulandes y Spaño tambe ta den cuadro cu mas y mas gobierno ta enfoca riba scol multilingual. Pero den e diversidad di autornan aki di diferente parti y lenga ta wordo refleha e diversidad, pero fundamentalmente e amistad. Igualmente e multi culturalidad cu ta presente den nos pais. El a defini e festival aki como berdaderamente un 'fiesta di buki'.

Participacion di scolnan

E biaha aki tambe e participacion di scolnan ta mas grandi cu e añanan anterior. E biaha aki un total di 65 scol ta participa loke casi ta nifica un 95% di nos scol primario. Como director di Biblioteca Nacional Aruba, sra. Britten a expresa su satisfaccion di por logra un participacion grandi di scolnan, unda nan ta hayando bishita di e autornan cu ta conta nan obranan, pintura y tambe como contado di historia. E scolnan cu e biaha aki

no a participa tin di haber pa motibo organisatorio.

Tambe e ta contento cu un biaha mas, ya pa 26 aña caba BNA por a organisa e actividad aki cu ta stimula y promove e bon customber di lesamento cerca nos muchanan.

"Stimula den nos muchanan e habito di lesamento. Den tur forma sea e manera fisico of digital, nos mester por domina e arte di lesamento cu ta hopi importante den cual ramo bo kier bay", el a declara na Bon Dia Aruba. Pero mas importante ta cu e muchanan por sinti e placer di lesamento y no cu nan ta sinti'e como algo fastioso.

Amistad

Festival di Buki pa Mucha e aña aki tin como tema: Amistad. El a bisa cu nan ta referi na amistad den tur sorto di forma, entre personanan, bestianan y hendenan. Durante e siman aki e autornan ta bishitando e diferente scolnan, tanto preparatorio, basico y special, pa asina sigui promove e amor di lesamento cerca nos muchanan.

Tur aña nan ta regala un buki na e muchanan y e biaha aki no tabata un excepcion. Esaki ta e regalo di siman di buki caminda pa cada compra di un buki un di e boekhandel presente ta entrega e buki 'Amigo Tur Caminda'. El a splica cu e biaha aki e buki di obsekio ta un compilacion di diferente autor cu a duna un aporte na e realisacion di e obra aki. Nan ta autornan di Hulanda, Surnam, Corsou, Bonaire y Aruba. Vanesa Paulina ta e ilustrado di e buki aki.

E clausura di e festival aki lo tuma luga diabierna awor na Arco Iris Kleuterschool, unda nan lo bisa ayo na e autornan cu a comparti den e actividad aki henter un siman.

